



## Universitätsbibliothek Paderborn

### **Instructio practica ...**

Institutiones Theologiæ Mysticæ, Seu Facilem & practicum modum  
Exercitia Spiritualia S.P. Ignatii Loyolæ per octiduum faciendi - item  
triduanam recollectionem fructosè instituendi complectens, Et  
Sacerdotibus Præcipuè, aut de Sacerdotali Statu suscipiendo  
deliberantibus accomodata, Una cum ...

**Lohner, Tobias**

**Dilingæ, 1680**

Consid. de patientia in genere.

[urn:nbn:de:hbz:466:1-48834](https://nbn-resolving.org/urn:nbn:de:hbz:466:1-48834)

bono operi laudem humanam, quo vis veneno magis noxiam immisceri, tantopere desideras?

5. In omnibus alijs causis Judicem apertum, id est, qui & propter scientiam possit, & propter integritatem velit, sincerè judicare, eligis; cur de operibus tuis judicium ferri ab hominibus cupis, quos plerumque ab affectibus suis corruptos malè judicare nōsti, imò nec posse verum judicium ferre, utpote qui intentionem, à qua tota operis bonitas pendet, non cognoscunt?

6. Si cum, qui de alienis gloriatur, tanquam suis, omnes oderunt, & derident, quid tu de talentis tuis aut operibus, tanquam ad te spectarent, laudem & gloriam quærens, aliud à Deo & Sanctis nisi displicentiam & indignationem expectare potes?

7. Si furtum omne cum honestis viris tantopere averfatis, cur rem omnium pretiosissimam, Deoquæ gratissimam, scilicet gloriam & laudem, eripere eidem Deo, & quidem inspectanti, non erubescis?

8. Quid sentires de eo, qui 100000. talenta debens Principi laudari cuperet de obolo soluto? æquè stultè tu agis, si de quocunque opere glorieris, cum etiam si omnia etiam possibilia virtutum opera fecisses, perinde se illa respectu beneficiorum Dei haberent, ac si obolum solvisses?

9. An non stultè ageret, qui Regem cum Aula pro spectatore habens, mendicis paucis placere cuperet? cur ergo tu hominum laudes tantopere desideras, cum Deum pro spectatore habeas, cujus unius judicium pluris faciendum est, quàm si ab omnibus Angelis & hominibus summè laudareris?

CONSIDERATIO

DE PATIENTIA IN GENERE.

1. Si Christus in tui sanitatem exhausti totum calicem passionis, cur tu saltem aliquot guttulas ad gloriam illius gustare renuas?

2. Qui amaritiam pilularum minus sentire volunt, hostiã easdem involvunt; cur non & tu tribulationes tuas Christi, qui pro nobis hostia factus est, passioni unis, ut leviùs illas feras?

3. Si Angelus tibi nuntiaret, esse divinam voluntatem, ut hanc

hanc vel illam adversitatem patiaris; an non libenter eam sufferes? atqui certior est fides, quam si Angelus de caelo nuntiaret, cur ergo promptè adversa excipere negligis?

4. Immensum aestimasses favorem, si vel unum istum flagelli excipere potuisses, ne Christo ille infligeretur, cur ergo non gaudes implere ea, quæ desunt passionibus Christi? nam Christus pro gloria Dei optavit omnes hominum cruciatus, & consequenter etiam hunc, quem sustines, laborem sentite; tolera ergo tu illum, & sic consolare Christum satisfaciens desiderio illius.

5. Solantur se alij in doloribus, si homines passionis socios habeant; cur tu non solatium hauris, quando vides te Deum passionis socios habere? si tribus Pueris in fornace Babylonica is, qui similis Filio Dei cum illis visus est, ignis æstus in ventum roris flantem convertit, quidni idem tibi in tribulationis fornace constituto facere possit Christus?

6. Quis mortem gravissimam meritis, non gauderet, si morbus ei adveniret, ob quem differretur, aut omnino auferretur supplicium? cur ergo tu non libenter patiaris quæcunque hujus mundi adversa, ut ab æterno supplicio libereris?

7. Urinatores pro vili præmio in aquas profundissimas se præcipitant, & tu pro cælesti præmio non libenter in mare tribulationum te conjicies?

8. B. Borgias omnia adversa tibi levia fecit, binos Legatos, scilicet cognitionem sui, & inferni præmittendo; quanto magis tibi omnes tribulationes jucundæ accident, si amorem Dei, Christi passi exemplum, considerationem inferni, & præmij cælestis præmiseris?

#### CONSIDERATIO

#### DE PATIENTIA IN SPECIE.

##### Contra Persecutiones.

1. **S**I Philosophiæ aut Theologiæ studiosi pro Benefactoribus specialibus agnoscunt eos, qui contra ipsos argumentantur, quia occasionem præbent profectus sui in doctrina ostendendi; cur tu eos, qui persequuntur, non diligis, cum & hi optimam tibi occasionem præbeant ostendendi, quantum in virtute profeceris?